



Fundasaun Mahein (FM), 13 Marsu 2019

Komunikadu Imprensa

## **Nomeasaun no Mandatu Komandante-Jeral no Segundu Komandante-Jeral Polícia Nacional de Timor-Leste (PNTL)**

Iha loron 27 Marsu 2019 PNTL sei selebra nia aniversariu ba dala-19 (sanolu resin-sia). Iha tempu hanesan mandatu Komandante-Jeral PNTL Komisáriu Julio da Costa Hornay no Segundu Komandante-Jeral Komisáriu Faustino da Costa ramata mos. Signifika katak nomeasaun foun ka renovasaun ba kargu Komandante-Jeral no Segundu Komandante-Jeral sei akontese. Nune'e prosesu nomeasaun ba kargu sira Komandante-Jeral no Segundu Komandante-Jeral hala'o tuir Dekretu Lei N.º 9/2009, loron 18 Feveireiru Lei Organika PNTL no Dekretu Lei N.º 16/2009 loron 18 Marsu Rejime Promosaun PNTL nia dispozisaun.

Komandante-Jeral PNTL maka Komisáriu ida ne'ebé hetan nomeasaun liu husi rezulusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian. Nune'e mos Segundu Komandante-Jeral PNTL maka Komisáriu ida ne'ebé hetan nomeasaun liu husi rezulusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian.

Nune'e rekezitu sira iha âmbito nomeasaun ba Komandante-Jeral no Segundu Komandante-Jeral tenke liu husi:

- a) Avaliasaun kurikulu katak haree ba kandidatu nia nivel edukasaun, formasaun no kursu sira ne'ebé kandidatu ne'e hetan ona. Liu-liu formasaun no kursu especialidade iha area relevante sira.
- b) Tenke Oficiais Superior ho postu Komisáriu ka Superintendente Xefe
- c) Minimu tinan 2 (rua) hela iha postu ne'e katak kandidatu ne'ebé nomea ba Komandante-Jeral PNTL minimu tenke hela iha postu Komisáriu ka Superintendente Xefe tinan rua.
- d) Komportamentu dixiplinar ne'ebé exemplar katak la involve iha kazu dixiplinar no kriminal ruma, no liu-liu komportamentu nu'udar exemplu iha PNTL nia laran.

Iha kazu nomeasaun Komandante-Jeral no Segundu Komandante-Jeral PNTL husi Oficiais Superior sira PNTL nian ho postu Superintendente Xefe promove automatikamente ba Komisáriu. Maibe tenke permanense ka hela iha postu ne'e minimu tinan rua. Nune'e mandatu ba Komandante-Jeral no Segundu Komandante-Jeral PNTL nian tinan 4 (haat) no bele renova ba periodu ne'ebé hanesan, liu husi rezulusaun Konsellu Ministru nian hafoin simu pareser husi Konsellu Superior Polisia nian no proposta Ministru ne'ebé responsavel ba pasta seguransa.

Iha sirkuntansia ne'e, opiniaun no sujestaun husi públiku kona-bá kandidatu Komandante-Jeral no Segundu Komandante-Jeral sujere mos kandidatu husi feto ba pozisaun refere. Iha ne'ebé fahir ba figura feto sira ne'ebé daudaun ne'e iha kategoria Oficiais Superior. Nune'e mos figura feto sira ne'ebé iha esperiensa no komanda iha pozisaun sira aas PNTL nian. Ministru ne'ebé responsavel ba pasta Seguransa (Ministru Interior Interinu) responde katak feto sira iha PNTL la prenxe rekezitu sira nomeasaun nian.

FM nia observasaun haree katak la prenxe rekezitu sira iha Lei la signifika katak feto labele kandidata ka nomea ba Komandante-Jeral no Segundu Komandante-Jeral. Iha ne'ebé Dekretu Lei N.º 9/2009, loron 18 Feveiru Lei Organika PNTL no Dekretu Lei N.º 16/2009, loron 18 Marsu Rejime Promosaun PNTL la limite feto nomea ba kargu Komandante-Jeral no Segundu Komandante-Jeral. Maibe ema ne'ebé sai hanesan kandidatu no nomea ba pozisaun rua ne'e tenke hala'o tuir Dekretu Lei N.º 16/2009, loron 18 Marsu Rejime Promosaun PNTL nia dispozisaun. Ho ida ne'e haree ba figura feto sira ne'ebé iha PNTL nia laran hotu-hotu ho deit postu Superintendente. Signifika katak la prenxe rekezitu ne'ebé estabelese iha n.º 1 artigu 23 no n.º 1 artigu 24 Dekretu Lei N.º 16/2009, loron 18 Marsu Rejime Promosaun PNTL nia dispozisaun.

### **Rekomendasaun**

1. Rekomenda ba Ministru ne'ebé responsavel ba pasta Seguransa (Ministru Interior Interinu) no Konsellu Ministru halo avaliasaun ida rigorozu tuir rekezitu sira ne'ebé estabelese iha n.º 1 artigu 23 no n.º 1 artigu 24 Dekretu Lei N.º 16/2009, loron 18 Marsu Rejime Promosaun PNTL antes halo nomeasaun.
2. Rekomenda ba Ministru ne'ebé responsavel ba pasta Seguransa (Ministru Interior Interinu) no Konsellu Ministru iha prosesu avaliasaun ne'e husu Konsellu Superior Polísia (PNTL) fó pareser ida ne'ebé nia dadus mai husi Departamentu Rekursu Umanu no Departamentu Justisa PNTL nian.
3. Rekomenda involve mos entidade relevante sira hanesan Tribunal, Ministériu Públiku, Komisaun Anti Korrupsaun (KAK), Provedoria Direitus Humanus no Justisa (PDHJ) iha prosesu avaliasaun ne'e ligadu ho aktu krime no dixiplinar nian.

Atu hetan informasaun kle'an liu kona-bá asuntu ne'e bele kontaktu:

#### **João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemovel: (+670) 7756 1184

Website: [www.fundasaunmahein.org](http://www.fundasaunmahein.org)